



Hokejaš Saša Martinović na Arena Ice Fever

## Ledena groznica u pulskoj Areni

Trođnevni hokejski spektakl Arena Ice Fever – Pula MMXII, upriličen u pulskoj Areni, privukao je navijače i ljubitelje ovog sporta na ledu iz cijelog svijeta. Ovaj sportski događaj na neuobičajenom prostoru upoređen je s igranjem tenisa na vrhu hotela Burj Al Arab u Dubaiju, takmičenjem u squashu ispred piramide u Gizi, košarkaškim mečevima na nosaču aviona i teniskim okršajima u londonskoj koncertnoj dvorani Royal Albert Hall. A u Areni smo pronašli igrača zagrebačkog Medveščaka Sašu Martinovića odjevenog u Džekin dres. Porijeklom Tuzlak, rođen u Füssenu, Saša je dvije godine igrao hokej za klub Grizzly Adams iz Wolfsburga, a u Njemačkoj se sprijateljio s našim reprezentativcima Edinom Džekom i Zvjezdanom Misimovićem. (Mila Durić/Edin Tuzlak)




## Revija na otvorenom

Dizajneri Modika priredili su prvu reviju na otvorenom ispred showrooma koji se nalazi u pasažu Kamernog tetara 55. "Odlučili smo da modnom revijom promovišemo novi prostor i nadamo se da će ovakve prilike postati tradicija", kaže predsjednica Udruženja modnih djelatnika i kostimografa Modika Jasna Hadžimehmedović-Bekrić. Uz Jasnu, po pet modela za sezonu jesen/zima 2012/2013. predstavile su Amna Kunovac-Zekić, Lena Stefanović, Nermina Varešanović, Belma Lizde-Kurt, Nataša Erić, Ata Omerbašić, Ljiljana Šaković, autorski tim Oshyosh i Milan Senić, zlatni dečko Modika, kako kolege nazivaju jedinog muškarca među njima. (Živana Jovanović/Vanja Lisac)

## Autorica hronike bosanske ljepote i smrti

Iako već dvadeset godina živi u Švedskoj, neprolazna inspiracija spisateljice Aide Zaćiragić (47) su srednjovjekovna Bosna i rodno Jajce, istorijski zapamćeno kao posljednja prijestolnica bosanskih kraljeva. Nedavno je objavila knjigu *Žene iz priča i legendi Bosne i Hercegovine*. "Odrastajući u Jajcu, s drugom djecom igrala sam se u podnožju tvrđave, u nekadašnjim kraljevskim vrtovima. Voljeli smo zajedno s turistima ulaziti u mračne katacombe gdje su bile porodične grobnice Hrvoja Vukčića. Tu sam se igrala, nesvesna istorijske važnosti Jajca. Tek kasnije zainteresirala sam se za davnu prošlost, a posebno za žene koje su ostavile trag u našoj istoriji." Aida

je sakupila građu i opisala život jedanaest žena: Elizabeta Kotromanić, Jelena Gruba, Vojača, Katarina Kosača, Jelena Branković, Hasanaginica, Esma sultana, Diva Grabovčeva, Safikada, Emina i Laura Papo Bohoreta. Osim Emine, sve su one imale tragičan život, zbog čega je Zoran Ljubica, u kritičkom osvrtu, kako kaže Aida, nazvao knjigu *Kronikom bosanske ljepote i smrti*. Inspirisana Bosnom i srednjim vijekom, prije nekoliko godina napisala je knjigu *Kraljevstvo bijelih ljljana*, posvećenu tužnoj sudbini Katarine Kosače i njene djece, ali kao bajku sa sretnim završetkom. Sada piše uglavnom za djecu, a uskoro će objaviti i jednu slikovnicu za najmlađe.



Aida Zaćiragić, autorica knjige *Žene iz priča i legendi Bosne i Hercegovine*